

---

*Veertig / et fesen*

( ienakter 'de zwarvers')

Schreven veur et 40 jaorige jubileum van de Stellingwarver Schrieversronte

*Speulers:* Jannes : zwarver, vies – hoet – lange kepotte jasse- tassen - wodt 40 jaor goedaorig

Hendrik : zwarver, vies – baortien – lange jasse+kraeg - oolder as Jannes oarige man – legt Jannes et vuur soms an de schenen

Fetje : nette vrouw, mit (nep)hontien (=knuffel) foel en venienig (kan as driedubbelrolle)

Gerda : therapeute, medern – zaekelik – tassien - betien overdreven. (kan as driedubbelrolle)

Koosje : volkse vrouw, recht veur de raop – roeg - bodschoppetassen (zol 2 rollen speulen kunnen, ok die van Fetje)

Gerrie : nette huusvrouw, gauw aargens vies van - bodschoppetassen betien deftig (zol 2 rollen speulen kunnen, ok die van Fetje)

Lamkje : sportieve vrouw , is rond de 40 (kan as drie-dubbelrolle)

Simon : 'sokke-snoever', ernstig én onneuzel – alternatieve kleren kroje mit boeken

(Fetje – Gerda en Lamkje bin dus deur ien persoan te speulen.)

Teniel-groepen kun onderling ok een speuler(s) uutwisselen, bi'jeen tekot an speuler(s)

**Decorstokken:** et speult in een park op't aende van'e meitied

Drie-persoonbaank of 3 stoelen mit een klieid d'r over

3-delig scharm tot naevel/bosthoogte (misschien onderling lienen/uutlienen)

misschien een 'ofkapte boomstamme' om wat op te zetten

**Geluud:** Misschien geluud van voegels (zo now en dan)

- Veertig ! et fesien - 2 -

Op een baankien in et park zit Jannes diepe te slaopen en had te snurken.

Fettje komt op mit (nep)hontien op'e aarm en kikt even naor 'm, roekt an him ;hi'j stinkt, ze kniept de neuze dichte en gaot vlogge of.

Hen: (komt op, zet al zien tassen staorig daele- kontreleert of Jannes slapt - haelt een slierte vlaggies (as't kan Stellingwarver) uut iene van zien tassen en begint de baank te versieren. Stikt ok een (Stellingwarver?) vlaggien in et gat van Jannes's hoet.

...en as Jannes now ok nog een taart mit veertig keerzen hebben wil, moet ie die zels mar kopen. Ik bin blut...(keert zien pong omme) Wat een slaopkop zeg. Zol ie gister-aovend een 'veurof fesien' onder Blesbrogge had hebben mit een peer muskus-rotten? Even roeken. (roekt) Die roeken aandere, hi'j stinkt naor... rookwost! Da's verdocht ! (sloot Jan. es flink tegen beide schoolder, die blijft soezen)

Fet: (weer op mit 't hontien) Daor is nóg zoen griezsel....(wil snel votlopen)

Hen: (hooft heur tegen) Ho, ho, juffertien, stop es even....

Fet: (Verbaosd, geargerd) ...juffertien?! Ik bin een trouwde vrouw van 50....

Hen: (gniest) .....ik zee juffertien tegen dat mooie hontien van jow. (sarkastisch) Wil dat hontien mi'j wel even helpen? (hoest of en toe)

Fet: ( kwaad en foel) Dan daenk ik niet, dat hontien dot altied wat zien vrouwgien zegt! En die zegt:"loop deur bi'j zokke feuren!" Marre...waor kommen die vlaggies opiens weg?

Hen: Die heb ik daele hongen. Da's now krek et perbleem; mien kammeroad Jannes wodt vandaeg veertig en ik wil him fielseeren.....

Fet: ...en now slapt ie as een marmotte en snurkt ie as een eulifaant! Wat kan mien Polly daor an doen?! (Fetje dot krek as Polly leeft , dot as Polly van heur aarm springen wil)

Hen: As ik et goed hebbe... (overdriefft) kun zokke honties keffen dat et een lieve lust is.....

Fet: (foel)...ja, mar niet op kommando, Polly is gien wekker, diej' opwienen kunnen!!! Dát kan ok aandere.(trekt Jannes flink an de oren, die slapt deur) Wat een slome sloegerd...

Hen: Waacht, ik weet ok wat. (pakt een rooie buusdoek uut de buse en snuut d'r eerst in. Dan gaot ie aachter Jannes staon en trekt him de doek van links naor rechts onder de neuze deur, d'r gebeurt niks) Mag ik et riempien van Polly.... 'Pluus' even lienen?

Fet: Die wi'j' ok onder zien snotkoker deurhaelen zeker!? Nee heur, dan snottert Polly me douk et karpel onder! Jow kammeroad kon wel in koma liggen. Huud vol draank zeker?!

Hen: Nééé heur, roek mar. (Fet grieselt en dot et niet) Die roekt naor rookwost.

Fet: Is de HEMA zo vroeg al eupen?! (neuze in de wiend) Now ik gao veerder ....